

## Seaskak bide judizialari eta karrikako mobilizazioei helduko die Falloux legearen aurka

GARBINE UBEDA GOIKOETXEA



Uztaillean, Seaskako hainbat ordezkariak François Hollande Frantziako presidentearen PS alderdiaren egoitza okupatu zuten Baionan.

FRANTZIAKO GOBERNUAK berean segitzen du. Seaskari ez dio arnasarik hartzen utzi nahi. Azken bilkuran prefetak eta suprefetak adierazi zuten Falloux legea zorrotz baliatuko dutela, hau da, herriko etxeen baimena izanda ere, Seaskak ezingo ditu ikastolak jaso edo handitu eremu publikoan eta herriko etxeek zoru publikorik ezingo diote utzi eraikinak altxatzeko. Seaskak legea urratzen badu auzitara eramango du administrazioak.

Jarrera horren jakitun, Seaskaren ustez egoera larria da. Azkenaldian lehen lerrora ekarri diren bi adibideak Hendaiaiko eta Beskoitzeko ikastolarenak dira. Lehenengoari ez diote uzten eraikina handitzen eta bigarrenari lur publikoa merkaturako prezioan alokatzen ez diote utzi. Bi ikastolak baino, ia hogeik izango lukete antzeko arazoren bat, herriko etxeek utzitako eraikinetan edo lurretan ari direlako eskolak ematen. Denak dira arriskuan Frantziako Gobernuak jarrera aldatu eta

Falloux legea bertan behera uztea erabakitzen ez badu. Seaskaren iritziz, oso erraza da berriz ere Hendaiaiko eta Beskoitzeko egoerak errepikatzea, nahikoa delako hautesiren baten salaketa suprefetaren eskuetara heltzea.

Egoera larriari aurre egiteko bi borroka lerro abiatuko dituzte; batetik, Frantzian eta nazioartean salaketaren bidetari helduko diote, eta bestetik, karrikara aterako dira. Seaskaren iritziz, Falloux legeak berdintasun eskubidea urratzen du, alegia, hezkuntzako bigarren mailan lokal publikoa erabil daiteke, lehen mailan aldiz ez. Besteak beste, Auzitegi Konstituzionalera jotzea aztertzen ari da.

Karrikara begira, azaroaren 30ean Baterak antolatutako manifestaldiarekin bat egingo du Seaskak. Abenduaren 28 eta 29an berriz, festa aldarrikatzailea antolatuko dute Baionan. Taloteги handi bat prestatzeko asmotan dira, jai giroan errebindikazioari indar emateko.

## Elgoibarko IMHn enpresetako euskararen kudeaketaz

ELGOIBARKO Makina Erreminta Institutuak 8. aldiz antolatuko ditu *30+10 mintegia* izeneko jardunaldiak. Euskarak lan munduan hartzen duen lekuaz arituko dira, urtero bezala. Ondoko esparruetan aztertu eta hausnartuko dute euskararen presentzia: Lanbide Heziketa (Gehitu proiektua), Gasteizko merkataritza, ahozko erabilera, ingurune eleantitzean sarean ditugun tresnak, euskal enpresek atzerrian hizkuntza kudeaketa nola egiten duten, eta marka gisa euskalduntasuna erabiltzeak sortu ditzakeen aukerak.

### Elgoibarko IMHk urriaren 23ko jardunaldiei begira idatzitako iritzi artikuluan esanak:

"Biztanleen %20 dira txinatarrek San Francisco hirian. Dendaz beteriko auzoa dute, eskolak, elizak... Eremua zabaltzen ari dira oraindik. Hizkuntza ofiziala ez bada ere, atez ate zaborra biltzen duten kamioietan eta garraio publiko batzuetan errotuluak eta megafoniaz ematen diren oharrek hizkuntza horretan ere dira.

'E'k presentzia horren zergatiak galdetu dio. 'M'k ere hala egin zuen, eta begiruneagatik baino, pisu ekonomikoagatik dela erantzun zioten. Beraz, 'M'ri gogora etorri zaio komunitate bateko kideek dirua non eman erabakitzen duten neurrian, ingurunea eragin eta alda dezaketela.

'E'ren ustez, gurean ere hala izan da. Ikastolak, euskaltegiak... komunitateak jakin du behar zuena sortzen. Bestelako produktu eta zerbitzuei dagokienez, Eusko Jaurlaritzak 2011 urtean egindako *V. Inkesta soziolinguistikoa*ren emaitzen arabera 16 urtetik gorako 2.649.000 pertsonetatik 714.000 elebidunak dira eta 388.000 elebidun hartzaileak. Gutxienez, milioi bat bezero potentzial dituzte enpresek 20.000 Km<sup>2</sup> baino ez dituen eremuan. Agian, ez zaio palanka horri behar beste eragin, baina enpresa batzuek jakin dute baliatzen elikadura, jantzigintza, finantza-etxeak, telefonia... arloetan".